

"Službene novine Federacije BiH", br. 49/03

Na osnovu člana 19. stav 3., 20. stav 1., 21. stav 3., 23. stav 3., 26. stav 6., 29. stav 5., 32. stav 3., 33. stav 5., 36. stav 5. i 38. stav 2. Zakona o sjemenu i sadnom materijalu poljoprivrednog bilja ("Službene novine Federacije BiH", broj 55/01), uz saglasnost Zavoda za mjeriteljstvo, federalni ministar poljoprivrede, vodoprivrede i šumarstva, donosi

PRAVILNIK

O OSNOVNIM ZAHTJEVIMA O KVALITETU, PAKOVANJU I DEKLARISANJU SJEMENA POLJOPRIVREDNOG BILJA

I - OSNOVNE ODREDBE

Član 1.

Ovim pravilnikom propisuju se obaveze, postupci i metode za uzorkovanje sjemena radi utvrđivanja kvaliteta sjemena, uslovi i način pakovanja i deklarisanja sjemena, obaveze vođenja i obrasci evidencija koje vode dorađivači i uvoznici sjemena, te uslovi držanja i čuvanja sjemena u prodavnici.

Član 2.

Prema ovom pravilniku sjeme poljoprivrednog bilja su generativni dijelovi poljoprivrednog, ljekovitog i aromatičnog bilja, micelij gljiva, kao i vegetativni biljni dijelovi (gomolji, lukovice, presadnice i sl.) koji se upotrebljavaju kao reprodukcioni materijal za sjetvu, sadnju i razmnožavanje s ciljem poljoprivredne proizvodnje (u daljem tekstu: sjeme).

Obloženo sjeme jeste: pilirano, inkrustrirano i granulirano sjeme, sjeme u trakama i drugi oblici obloženog sjemena.

Micelij gljiva jeste: čista kultura micelija, micelij na različitim podlogama zrna pšenice, raži, itd. Micelij umiješan u posebno pripremljen supstrat za uzgoj gljiva.

Član 3.

Sjeme u prodavnici mora zadovoljavati odredbama Zakona o sjemenu i sadnom materijalu poljoprivrednog bilja i ovog pravilnika, te uslovima utvrđenim u osnovnim zahtjevima o kvalitetu, energiji klijanja, klijavosti, udjelu vlage i drugih svojstava utvrđenih ovim pravilnikom.

Član 4.

Ispitivanjem kvaliteta sjemena utvrđuje se: čistoća, klijavost, vlaga i zdravstveno stanje, a za određene biljne vrste i energija klijanja, masa 1.000 zrna i druga svojstva.

Kvalitet sjemena utvrđuje se na način i prema postupku koji su utvrđeni u "Metodama ispitivanja i osnovnim zahtjevima o kvalitetu sjemena".

Osnovni zahtjevi o kvalitetu sjemena u pogledu zdravstvenog stanja sjemena moraju odgovarati uslovima koji su utvrđeni Zakonom o zaštiti bilja od bolesti i štetočina koje ugrožavaju cijelu zemlju ("Službeni list RBiH", broj 2/92) i Zakona o zaštiti bilja od bolesti i štetočina ("Službeni list BiH", broj 4/92) i propisa donesenih na osnovu ovih zakona.

Čistoća sjemena, energija klijanja, klijavost sjemena, prisutnost sjemena drugih vrsta poljoprivrednog bilja i korova u uzorku sjemena moraju biti u granicama dopuštenih odstupanja koja su navedena u "Metodama ispitivanja i osnovnim zahtjevima o kvalitetu sjemena" koje su štampane uz ovaj pravilnik i čine njegov sastavni dio.

Post-kontrola je ponovljeno ispitivanje kvalitete sjemena koju obavlja ovlaštena laboratorija za ispitivanje kvaliteta sjemena u svrhu praćenja ispravnosti ispitivanja sjemena i deklarisanja.

"Službene novine Federacije BiH", br. 49/03

Post-kontroli podliježe 10% od ukupno proizvedenih i uvezenih partija sjemena u toku jedne godine.

II - POSTUPAK UZIMANJA UZORAKA

Član 5.

Vlasnik sjemena obavezan je podnijeti prijavu za uzorak za ispitivanje kvaliteta i post-kontrolu za svaku partiju sjemena koju namjerava deklarirati.

Prijava iz stava 1. ovog člana podnosi se ovlaštenoj laboratoriji za ispitivanje kvaliteta sjemena, upisanoj u Registar laboratorija za kontrolu kvaliteta poljoprivrednog sjemena, na obrascu br. 1. koji se nalazi u prilogu ovog pravilnika i čini njegov sastavni dio.

Ovlaštena laboratorija kojoj je podnesena prijava iz stava 2. ovog člana dužna je utvrditi kvalitet, te vlasnicima sjemena dostaviti izvještaj o kvalitetu sjemena na obrascu br. 2. koji se nalazi u prilogu ovog pravilnika i čini njegov sastavni dio.

Sjeme iz uvoza kojem je kvalitet sjemena utvrđen u dokumentima iz člana 18. ovog pravilnika ne podliježe obaveznom ispitivanju, ali je uvoznik dužan za svaku uvezenu partiju sjemena podnijeti prijavu iz stava 1. ovog člana radi uzimanja uzorka za potrebe post-kontrole.

Vlasnik sjemena dužan je čuvati uzorke sjemena za potrebe post-kontrole najmanje do isteka roka važenja deklaracije i po zahtjevu isti treba dostaviti ovlaštenoj laboratoriji.

Član 6.

Uzorci sjemena iz člana 5. ovog pravilnika uzimaju se u skladu sa postupkom propisanim u "Metodama ispitivanja i osnovnim zahtjevima o kvalitetu sjemena."

O uzimanju uzoraka sačinjava se zapisnik prema obrascu br. 3. koji se nalazi u prilogu ovog pravilnika i čini njegov sastavni dio.

Za svaku partiju sjemena, laboratorij formira dva istovjetna uzorka od kojih jedan koristi za ispitivanje, a drugi čuva i dostavlja ovlaštenoj laboratoriji za potrebe post-kontrole.

Na svaki uzorak upisuje se oznaka partije sjemena, naziv lica koje je deklariralo sjeme, broj zapisnika o uzorkovanju i ime/naziv laboratorije.

Uzorci sjemena se čuvaju najmanje do isteka roka važenja deklaracije.

Član 7.

Ovlašteni laboratorij će ponovo uzorkovati na 5% partija sjemena na kojima se vrši post-kontrola radi provjere ispravnosti uzorkovanja.

O rezultatima ispitivanja uzoraka sjemena u post-kontroli, ovlaštena laboratorija izvještava lice koje je deklariralo sjeme i laboratorij.

Član 8.

Prilikom uzimanja uzoraka za inspeksijske poslove iz zbirnog uzorka se formiraju dva prosječna uzorka, te ukoliko je to potrebno dva uzorka za ispitivanje vlage u sjemenu.

Jedan uzorak iz stava 1. ovog člana dostavlja se ovlaštenoj laboratoriji, a drugi ostaje vlasniku sjemena.

Nakon obavljenog ispitivanja ovlašteni laboratorij čuva uzorak šest mjeseci, osim uzorka gomolja, lukovica i sl. koji se čuvaju 30 dana.

"Službene novine Federacije BiH", br. 49/03

Uzorci za ispitivanje udjela vlage u sjemenu važe 48 sati.

Član 9.

Uzorak sjemena uzet za inspekcijske potrebe pakuje se prema postupku opisanom u "Metodama ispitivanja i osnovnim zahtjevima o kvalitetu sjemena."

Na pečatu odnosno plombi mora biti vidljivo otisnuta oznaka nadležnog organa čiji je inspektor uzeo uzorak.

Pečat ili plomba stavljaju se tako da se onemogući otvaranje ambalaže bez oštećenja pečata odnosno plombe.

Na ambalaži uzorka za inspekcijske potrebe stavlja se naljepnica (etiketa) koja sadrži:

1. šifru uzorka;
2. vrstu bilja;
3. datum uzimanja uzorka;
4. naziv preparata kojim je sjeme tretirano;
5. potpis inspektora koji je uzeo uzorak.

Član 10.

O uzimanju uzorka za inspekcijske potrebe sastavlja se zapisnik na obrascu br 14. koji se nalazi u prilogu ovog pravilnika i čini njegov sastavni dio.

U zapisniku se unose i podaci o specifičnim okolnostima koje bi mogle uticati na kvalitet sjemena, ako su takve okolnosti postojale pri uzimanju uzorka, uz naznaku da je uzorak uzet na način propisan ovim pravilnikom.

Zapisnik se dostavlja licu od kojeg je uzet uzorak i licu koje je sjeme deklariralo.

Član 11.

Nakon analize uzoraka za inspekcijske potrebe ovlašteni laboratorij dužan je dostaviti tri primjerka izvještaja o kvalitetu sjemena inspektorima koji je dostavio uzorak.

Inspektor zadržava prvi primjerak izvještaja, drugi dostavlja licu od koje je uzet uzorak, a treći primjerak, sa zapisnikom, licu koje je deklariralo sjeme.

III - PAKOVANJE I DEKLARISANJE SJEMENA

Član 12.

Sjeme, presadnice i micelij gljiva razvrstava se u partije sjemena.

Partija sjemena jeste određena količina sjemena, ujednačenog kvaliteta, iste vrste, sorte, kategorije, sortne čistoće, godine proizvodnje i porijekla, obilježena i snabdjevena propisanim dokumentima o kvalitetu.

Partija sjemena biljnih vrsta, koje nemaju priznate sorte (cvijeće, ljekovito, aromatično i hortikulturno bilje), jeste određena količina sjemena koju je proizveo jedan proizvođač u toku jedne iste godine, a koju prati propisana dokumentacija o kvalitetu sjemena.

"Službene novine Federacije BiH", br. 49/03

Partija presadnica jeste proizvedena određena količina presadnica, koja je pod određenim rednim brojem upisana u knjigu evidencije o proizvodnji presadnica.

Partija dopuštene mješavine sjemena je količina sjemena do 10.000 kg, obilježena i snabdjevena propisanim dokumentima.

Gornja granica za veličinu partije određena je u normama kvaliteta sjemena, osim za sjeme u trakama. Za sjeme s omotačem dopušteno je odstupanje u veličini partije do 5% za dodatni inertni materijal (omotač i sl.)

Partija sjemena mora biti obilježena brojem deklaracije prema kojem se može ustanoviti vjerodostojnost za svako pojedinačno pakovanje u toj partiji.

Kalibrirano sjeme i drugi oblici prema veličini, obliku i ujednačenosti sjemena pakuju se prema frakcijama u posebne partije.

Sjeme se može pakovati i prema broju sjemenki.

Pakovanja u jednoj partiji sjemena moraju biti iste neto mase ili istog broja sjemenki izuzev pakovanja: sjemena povrća, cvijeća, krmnog, ljekovitog, aromatičnog bilja, lukovica, lučica, gomolja i podanaka, neto mase pakovanja I kilogram i manje koja ne moraju biti iste neto mase ili istog broja sjemenki.

Originalna (zbirna) pakovanja su pakovanja koja sadrže više pakovanja neto mase I kg i manje.

Pakovanja po broju sjemenki, lukovica, gomolja i podanaka neto mase veće od I kg moraju biti istog broja sjemenki, lukovica, gomolja i podanaka.

Partija micelija gljiva i presadnica ne mora biti pakovana u jednaka pakovanja.

Član 13.

Sjeme se pakuje u neoštećene, čiste, suhe, dovoljno jake i čvrste vreće, vrećice, kutije i kontejnere koje je moguće zapečatiti i obilježiti jedinstvenom oznakom za identifikaciju.

Materijali za ambalažu sjemena mogu biti od prirodnih ili vještačkih vlakana, papira, impregniranog materijala, plastičnih i metalnih folija ili njihovih kombinacija.

Član 14.

Gomolji, lukovice i drugi dijelovi poljoprivrednog bilja koji su obilježeni kao sjeme mogu se pakovati i u košare, sanduke, vreće i sličnu ambalažu.

Presadnice golog korijena i proizvedene u prešanim blokovima, pakuju se u sandučice, kutije i sl., presadnice proizvedene u kontejnerima prodaju se zajedno sa kontejnerima.

Micelij koji se stavlja u promet mora biti pakovan u odgovarajuću ambalažu.

Član 15.

Sjeme namijenjeno izvozu može se pakovati i na način predviđen ugovorom između prodavača i inostranog kupca, ali tako da se zadovolji prijevoznj i drugoj manipulaciji do krajnjeg odredišta.

Član 16.

Ambalaža se mora zatvoriti tako da se može utvrditi da je sjeme originalno pakovano odnosno da se može uočiti svaka radnja kojom bi se povrijedila originalnost pakovanja.

"Službene novine Federacije BiH", br. 49/03

Ako se ambalaža zatvara vezivanjem, stavlja se metalna ili plastična plomba. Vezuje se tako da se ambalaža ne može otvoriti bez skidanja odnosno oštećenja plombe. Na plombi mora biti vidljivo ispisana oznaka lica koje je sjeme pakovalo.

Ambalaža je plombirana i kada je zatvorena prošivanjem ili lijepljenjem mašinski (toplinski, pod pritiskom, vreće s ventilom i sl.).

Član 17.

Prilikom zatvaranja ambalaže na nju se učvršćuje deklaracija.

Ako se ambalaža zatvara prošivanjem mašinom, deklaracija koja se stavlja na ambalažu, prošije se ili utiskuje odnosno lijepi na ambalažu.

Ako se ambalaža zatvara lijepljenjem, deklaracija se utiskuje ili lijepi na ambalažu, a ako je ambalaža prozirna, deklaracija se može staviti na vidljivo mjesto u ambalaži.

Ako se ambalaža zatvara vezivanjem, deklaracija se vezuje za ambalažu i osigurava plombom.

Pakovanja sjemena iz kojih su uzeti uzorci za inspekcijske potrebe smatraju se originalnim pakovanjem ukoliko su vidljivo obilježena oznakom inspekcije koja je uzela uzorak, uzorkovanjem za inspekcijske potrebe ne narušava se originalnost pakovanja.

Član 18.

Sjeme iz domaće proizvodnje deklarira se na osnovu originalnih dokumenata koji moraju pratiti proizvodnju sjemena:

1. uvjerenje o priznavanju sjemenskog usjeva;
2. uvjerenje o zdravstvenom stanju usjeva;
3. izvještaj o kvalitetu sjemena poljoprivrednog bilja.

Ovisno o vrsti bilja, sjeme iz uvoza deklarira se na osnovu originalnih dokumenata koji moraju pratiti sjeme:

1. certifikat o sortnosti (OECD);
2. certifikat o kvalitetu sjemena (ISTA-orange); i
3. certifikat o zdravstvenom stanju bilja (fitocertifikat);
4. specifikacija uvezene robe.

Spisak biljnih vrsta koje su u sastavu OECD certificiranja, nalazi se u prilogu ovog pravilnika i čini njegov sastavni dio.

Sjeme povrća kategorija: osnovno sjeme i certificirano sjeme iz uvoza deklarira se na osnovu dokumenta:

1. certifikat o kvalitetu sjemena (ISTA-orange);
2. dokument o sortnosti izdat od ovlaštene ustanove zemlje izvoznice;
3. certifikat o zdravstvenom stanju bilja (fitocertifikat);
4. specifikacija uvezene robe.

"Službene novine Federacije BiH", br. 49/03

Sjeme povrća kategorije: standardno i hibridno sjeme (F1 generacije), iz uvoza deklarirane se na osnovu dokumenata:

1. o kvalitetu sjemena laboratorija zemlje izvoznice;
2. o sortnosti sjemena;
3. certifikat o zdravstvenom stanju bilja (fitocertifikat);
4. specifikacija uvezene robe.

Sjemenski krompir, lučice luka, češnjevi češnjaka, deklarirane se na osnovu dokumenata:

1. certifikat o sortnosti izdat od nadležne ustanove zemlje izvoznice (NAK, NAFG, ENSA);
2. certifikat o zdravstvenom stanju bilja (fitocertifikat);
3. specifikacija uvezene robe.

Sjeme cvijeća, ljekovitog i aromatičnog bilja iz uvoza deklarirane se na osnovu dokumenata:

1. o kvalitetu sjemena laboratorij zemlje izvoznice;
2. certifikat o zdravstvenom stanju bilja (fitocertifikat);
3. specifikacija uvezene robe.

Sjeme trava, djetelina, travnih smjesa djetelinsko-travnih smjesa, neto mase pakovanja 1 kg i manje koja se nalaze unutar originalnog (zbornog) pakovanja, kategorije certificirano sjeme druge generacije (C2), iz uvoza deklarirane se na osnovu dokumenata:

1. o kvalitetu sjemena laboratorije zemlje izvoznice;
2. dokument o sortnosti izdat od ovlaštene ustanove zemlje izvoznice;
3. certifikat o zdravstvenom stanju bilja (fitocertifikat);
4. specifikacija uvezene robe.

Pakovanje sjemena neto mase 1 kg i manje koje se nalaze unutar originalnog (zbornog) pakovanja, deklarirane se na osnovu dokumenata koji prati originalno (zbirno) pakovanje.

Za originalna (zbirna) pakovanja ovlaštena laboratorija izdaje deklaraciju na ambalaži.

Za pakovanja iz stava 9. ovog člana koja se nalaze unutar originalnog (zbornog) pakovanja, uvoznik i dorađivač sam štampa deklaraciju na ambalaži u skladu s članom 24. ovog pravilnika.

U slučaju prepakivanja u manja pakovanja, nova deklaracija se izdaje na osnovu važeće deklaracije.

Sjeme poljoprivrednog bilja namijenjeno za vođenje postupka priznavanja i zaštite sorte mora pratiti certifikat o zdravstvenom stanju bilja (fitocertifikat).

Član 19.

Presadnice deklarirane proizvođač na osnovu deklaracije o kvalitetu sjemena iz kojeg je proizvedeno, a micelij jestivih i ljekovitih gljiva deklarirane proizvođač odnosno uvoznik- prema odredbama ovog pravilnika.

"Službene novine Federacije BiH", br. 49/03

Presadnice i micelij jestivih i ljekovitih gljiva moraju imati deklaraciju uz otpremnicu prema obrascu br. 8. koji se nalazi u prilogu ovog pravilnika i čini njegov sastavni dio.

Za presadnice i micelij jestivih i ljekovitih gljiva broj deklaracije uz otpremnicu je redni broj izdavanja dokumenta.

Član 20.

Dorađivač i uvoznik sjemena dužni su podnijeti zahtjev za izdavanje deklaracije kantonalnom ministarstvu nadležnom za poslove poljoprivrede (u daljem tekstu: kantonalno ministarstvo).

Zahtjev za izdavanje deklaracije propisan je na obrascu br. 4 i 4 a., koji se nalaze u prilogu ovog pravilnika i čini njegov sastavni dio.

Sadržaj deklaracije uz otpremnicu propisan je na slijedećim obrascima:

- br. 5. za sjeme poljoprivrednog bilja;
- br. 6. za gomolje;
- br. 6a. za lukovice i podanke;
- br. 7. za mješavine sjemena;
- br. 8. za micelij gljiva.

Sadržaj deklaracije na ambalaži propisan je na slijedećim obrascima:

- br. 8a. za presadnice;
- br. 9. za sjeme poljoprivrednog bilja;
- br. 9a. za mješavine sjemena;
- br. 10. za gomolje;
- br. 10 a. za lukovice i podanke.

Obrasci su štampani uz ovaj pravilnik i čine njegov sastavni dio.

Član 21.

Za poljoprivredno sjeme broj deklaracije uz otpremnicu sastoji se od tri grupe oznaka odvojenih kosom linijom ili crtom na način da:

- prva grupa brojeva obilježava redni broj u evidenciji o masi preuzetog sjemena (u daljem tekstu: evidencija) kod dorađivača odnosno uvoznika;
- druga grupa oznake obilježava broj partije unutar rednog broja u evidenciji;
- treća grupa oznake obilježava proizvodnu godinu u kojoj se vrši deklarisanje.

U slučajevima produživanja roka važenja deklaracije, za lica koja ne vode Knjigu evidencije, postojećem broju deklaracije dodaju se slijedeće grupe oznaka odvojenih kosom linijom ili crtom na način da:

- prva slijedeća grupa oznake obilježava redni broj pod kojim je zaprimljen zahtjev za produživanje roka važenja deklaracije kod kantonalnog ministarstva;
- druga slijedeća grupa oznake obilježava vegetacijsku godinu u kojoj se obavlja produživanje roka važenja deklaracije.

Član 22.

Svaki primjerak deklaracije na ambalaži koji izdaje i distribuira Federalno ministarstvo poljoprivrede, vodoprivrede i šumarstva (u daljem tekstu: Federalno ministarstvo) ima serijski broj.

Deklaracija na ambalaži štampa se u bojama ovisno o kategoriji.

Predosnovno sjeme -"plavo"

"Službene novine Federacije BiH", br. 49/03

Osnovno sjeme -"plavo"

Certificirano sjeme prve generacije -C1-"crno "

Certificirano sjeme druge generacije - C2-"crno "

Certificirano sjeme treće generacije - C3-"crno "

Hibridno sjeme -"crno"

Standardno sjeme povrća -"crno".

Član 23.

Za pakovanje sjemena povrća, cvijeća, trava, djetelina, mješavina trava, djetelinskih smjesa i travno djetelinskih smjesa, ljekovitog, aromatičnog bilja i lučice luka, neto masa pakovanja 1 kg i manje, te pakovanja prema broju lukovica, gomolja, podanaka i broju sjemenki povrća dorađivač odnosno uvoznik sam štampa deklaraciju na ambalaži sa podacima propisanim na obrascima br. 9., 9a., 10. i 10a, na način da je utisne na ambalažu ili u drugom obliku neodvojivo učvrsti na pakovanje.

Član 24.

Za sjeme vrsta poljoprivrednog bilja iz člana 12. stav 3. ovog pravilnika, koje nemaju priznate sorte, a dopušteno ih je stavljati u prodaju izdaje se deklaracija na obrascima iz člana 21. ovog pravilnika, s tim da se pod "sorta" i "kategorija" mora staviti crtica.

Za lučicu luka (*Allium cepa* L.) u deklaracijama na obrascima br. 6. i 10. pod "kategorijama" stavlja se "crtica".

Deklaracija na ambalaži za sjeme iz stava 1. ovog člana štampa se u crnoj boji.

Član 25.

Za sjeme vrsta poljoprivrednog bilja kojima kvalitet sjemena nije regulisano u Osnovnim zahtjevima o kvalitetu sjemena u deklaracijama upisuju se podaci o kvalitetu ispitani na način i po postupku koji su utvrđeni u "Metodama ispitivanja i osnovnim zahtjevima o kvalitetu sjemena".

Član 26.

Rok važenja deklaracije iz člana 21. ovog pravilnika određuje lice koje je deklariralo sjeme.

Član 27.

Deklaracija se može produžiti, ako sjeme zadovoljava uslovima kvaliteta.

Vlasnik sjemena dužan je podnijeti zahtjev za produžavanje roka važenja deklaracije kantonalnom ministarstvu.

Zahtjev se podnosi na obrascu br. 4. koji se nalazi u prilogu ovog pravilnika i čini njegov sastavni dio.

Uz zahtjev se prilaže stara deklaracija uz otpremnicu i izvještaj o kvalitetu sjemena ovlaštene laboratorije, ne stariji od 15 dana.

Član 28.

Nakon produžavanja roka važenja deklaracije za deklarirani kvalitet sjemena odgovara vlasnik sjemena.

"Službene novine Federacije BiH", br. 49/03

Član 29.

Sjeme tretirano sredstvima za zaštitu bilja mora imati, na deklaraciji na ambalaži i na deklaraciji uz otpremnicu, navedeno ime sredstva kojim je tretirano i kalauzulu "sjeme je zagađeno i ne smije se upotrebljavati za ishranu ljudi, domaćih životinja, riba, ptica i divljači".

Član 30.

Sjeme u omotaču mora imati, na deklaraciji na ambalaži i na deklaraciji uz otpremnicu, napomenu da je sjeme pilirano inkrustrirano, granulirano, u trakama segmentirano, odnosno kalibrirano sa dimenzijom i oznakom frakcije.

Sjeme pakovano po broju sjemenki mora imati, na deklaraciji na ambalaži i na deklaraciji uz otpremnicu, naveden broj sjemenki u pakovanju.

Član 31.

Evidencija o izdatim deklaracijama na ambalaži i uz otpremnicu vodi kantonalno ministarstvo u obliku knjige prema obrascu br. 13., koji se nalazi u prilogu ovog pravilnika i čini njegov sastavni dio.

Kantonalna ministarstva dužna su jednom godišnje, knjigu evidencije dostaviti Federalnom ministarstvu na uvid i ovjeru najkasnije do 31. decembra.

IV - EVIDENCIJA O PROIZVODNJI, DORADI I UVOZU SJEMENA, PRESADNICA I MICELIJA GLJIVA

Član 32.

Za svaku proizvodnu godinu dorađivač i uvoznik dužni su voditi evidenciju o masi preuzetog, dorađenog i uvezenog sjemena.

Evidencija se vodi u knjizi "Evidencija o masi preuzetog sjemena", koju izdaje Federalno ministarstvo prema obrascu br. 11., koji se nalazi u prilogu ovog pravilnika i čini njegov sastavni dio.

Nakon zaključivanja evidencije za proizvodnu godinu unose se podaci o nedeklarisanim količinama sjemena.

Ispod zadnjeg broja ulaza robe podvlači se linija i unose se podaci o nedeklarisanim količinama sjemena sa istim rednim brojem pod kojim su zavedeni u evidenciju.

Proizvodna godina je godina u kojoj počinje vođenje evidencije i predstavlja period od 1. juna tekuće godine do 31. maja slijedeće godine.

Dorađivač i uvoznik dužni su jednom godišnje, knjigu evidencije dostaviti kantonalnom ministarstvu, koju nakon provjere kantonalno ministarstvo šalje Federalnom ministarstvu na pregled i ovjeru najkasnije do 1. jula.

Evidencija za novu proizvodnu godinu počinje od rednog broja I.

Na zahtjev dorađivač i uvoznik sjemena dužni su dostaviti podatke o zalihama deklarisanog sjemena.

Član 33.

Proizvođač i uvoznik micelija gljiva i presadnica dužan je voditi evidenciju o masi proizvedenih ili uvezenih količina micelija gljiva i presadnica prema obrascu br. 12.

Najmanje jednom godišnje proizvođač odnosno uvoznik micelija gljiva i presadnica dužan je ispunjen obrazac br. 12. dostaviti kantonalnom ministarstvu koje nakon provjere prijavu prosljeđuje Federalnom ministarstvu.

"Službene novine Federacije BiH", br. 49/03

Obrazac br. 12 koji se nalazi u prilogu ovog pravilnika i čini njegov sastavni dio.

V - USLOVI DRŽANJA SJEMENA U PRODAVNICI

Član 34.

Sjeme u prijevozu te prodavnici na veliko i malo mora biti odvojeno od štetnih materijala, držano u uslovima, koji osiguravaju održavanje kvaliteta, zaštićeno od oštećenja ili kontaminacije sjemena i ambalaže u kojoj je pakovano od herbicida, ostalih isparivih supstanci, insekata, glodara i gljivica.

Član 35.

Pravna lica registrovana za obavljanje djelatnosti prometa sjemenom moraju imati odvojen prostor u skladištu u kojem će sjeme biti složeno po vrstama i sortama i na način da je omogućen lagan pristup i kontrola sjemena.

U prodavnici sjemena, sjeme mora biti zaštićeno od izvora topline i zračenja toliko da se temperatura ambalaže ne diže iznad prosječne temperature zraka u prostoriji, da ne dolazi do promjene boje na ambalaži i deklaraciji na pakovanju. Sjeme mora biti odvojeno od drugih proizvoda koji na bilo koji način mogu umanjiti deklarirani kvalitet sjemena.

Za smanjenje kvaliteta sjemena nastalo neodgovarajućim načinom čuvanja u skladištu, neodgovarajućim postupcima pri transportu, odnosno ne poduzimanjem potrebnih mjera, odgovara pravno lice koje ih nije preduzelo.

VI - PRIJELAZNE I ZAVRŠNE ODREDBE

Član 36.

Stupanjem na snagu ovog pravilnika na teritoriji Federacije Bosne i Hercegovine prestaje primjena Pravilnika o kvalitetu sjemena poljoprivrednog bilja ("Službeni list SFRJ", br. 47/87, 60/87, 55/88 i 81/89).

Član 37.

Ovaj pravilnik stupa na snagu narednog dana od dana objavljivanja u "Službenim novinama Federacije BiH"

Broj 04-24-219/03
11. septembra 2003. godine
Sarajevo

Ministar
Marinko Božić, s. r.